

Սակագնային մարժայի համաձայնագիր

ք. Երևան
«_____» _____ 200_թ.

Հայաստանի Հանրապետության էներգետիկայի հանձնաժողովը, որը գործում է
«Էներգետիկայի մասին» ՀՀ օրենքի հիման վրա և ռազմավարական ներդրողը՝

_____ ընկերությունը,
_____ ընկերության անվանումը

_____ հասցեն
ի _____ դեմս

_____,
_____ պաշտոնը, անունը, ազգանունը

որը գործում է _____

հիման վրա, հիմք ընդունելով «Հայաստանի Հանրապետության պետական գույքի
մասնավորեցման 1998-2000 թվականների ծրագրի մասին» Հայաստանի
Հանրապետության օրենքում լրացում կատարելու և «Երևանի էլեկտրացանց»,
«Հյուսիսային էլեկտրացանց», «Հարավային էլեկտրացանց» և «Կենտրոնական
էլեկտրացանց» փակ բաժնետիրական ընկերությունների մասնավորեցման մասին» ՀՀ
օրենքը, կնքեցին սույն սակագնային համաձայնագիրը հետևյալի մասին.

1. Համաձայն «Հայաստանի Հանրապետության պետական գույքի
մասնավորեցման 1998-2000 թվականների ծրագրի մասին» Հայաստանի
Հանրապետության օրենքում լրացում կատարելու և «Երևանի էլեկտրացանց»,
«Հյուսիսային էլեկտրացանց», «Հարավային էլեկտրացանց» և «Կենտրոնական

էլեկտրացանց» փակ բաժնետիրական ընկերությունների մասնավորեցման մասին» ՀՀ օրենքի 9-րդ հոդվածի 1-ին կետում ամրագրված պայմանի, բաժնետոմսերի առուվաճառքի պայմանագրի ստորագրման պահից մինչև 2004 թվականի հունվարի 1-ը բաշխիչ նոր ընկերությունների համար կգործի ԱՄՆ-ի արժույթով արտահայտված գործող մարժան չգերազանցող անփոփոխ սակագնային մարժա, որն առանց ԱԱՀ-ի կկազմի 1.35 ԱՄՆ ցենտ/կՎտժ:

2. Հետագա տարիներին՝ սկսած 2004 թվականի հունվարի 1-ից, բաշխիչ նոր ընկերությունների համար սակագնային մարժան կսահմանվի ՀՀ էներգետիկայի հանձնաժողովի կողմից մշակված մեթոդաբանությամբ, որի հիմքում կդրվի անհրաժեշտ հասույթի ապահովման սկզբունքը, այսինքն՝

Անհրաժեշտ հասույթ = Շահագործման և պահպանման ծախսեր +
+ Մաշվածք + Գնված էլեկտրաէներգիայի արժեք + Հարկեր +
+ Անհուսալի դեբիտորական պարտքեր + Թույլատրելի զուտ շահույթ,
որտեղ՝

Շահագործման և պահպանման ծախսերը կընդգրկեն հանձնաժողովի կողմից հաստատված տեխնիկական սպասարկման և նորոգման, շահագործման համար անհրաժեշտ նյութերի ծախսերը, աշխատավարձը, պարտադիր սոցիալական ապահովագրության վճարները, վարչական, կառավարման, իրացման և ընդհանուր բնույթի այլ ծախսեր:

Մաշվածքը կհաշվարկվի մրցույթի արդյունքում ձևավորված նոր ընկերության հիմանական ակտիվների և հետագա ներդրումների գումարից՝ գծային եղանակով, ելնելով ակտիվների կյանքի տևողությունից:

Գնված էլեկտրաէներգիայի արժեքը կորոշվի հետևյալ բանաձևով.

Գնված էլեկտրաէներգիայի արժեք = [Իրացված էլեկտրաէներգիայի քանակություն : (1- Հանձնաժողովի կողմից հաստատված տեխնոլոգիական կորուստների նորմ)] x Էլեկտրաէներգիայի գնման միջին կշռությային սակագին:

Հարկերը (բացառությամբ ԱԱՀ-ի) կհաշվարկվեն ՀՀ հարկային օրենսդրության համաձայն՝ հիմք ընդունելով սակագնային մարժայի հաշվարկում ընդունված հասույթը և ծախսերը:

Անհուսալի դեբիտորական պարտքերը, որոնք իրենցից ներկայացնում են ընկերության կողմից սպառողներին առաքված, սակայն չվճարված էլեկտրաէներգիայի արժեքը, անհրաժեշտ հասույթի կազմում կներառվեն հանձնաժողովի կողմից սահմանված նորմերով:

Թույլատրելի զուտ շահույթը կորոշվի հետևյալ բանաձևով.

Թույլատրելի զուտ շահույթ = Շահույթի հաշվարկման բազա x Ակտիվների շահութաբերության նորմա = [Նոր ընկերության մրցույթի արդյունքում ձևավորված գին + Մինչ սակագնային մարժայի վերանայման պահը օգտակար և օգտագործվող ակտիվներում կատարված ներդրումներ + Հանձնաժողովի կողմից ընդունված անհրաժեշտ շրջանառու կապիտալ - Կուտակված մաշվածք] x Ակտիվների շահութաբերության նորմա:

Սակագնային մարժան կորոշվի հետևյալ բանաձևով.

Սակագնային մարժա = (Անհրաժեշտ հասույթ : Իրացված էլեկտրաէներգիայի քանակություն) - էլեկտրաէներգիայի գնման միջին կշռությանին սակագին:

3. 2004-2008թթ. ժամանակահատվածի յուրաքանչյուր օրացուցային տարում հանձնաժողովը կընդունի ակտիվների շահութաբերության 16,0% հաշվարկային նորմա՝ շահույթի հաշվարկման բազայի նկատմամբ:

Հետագա տարիների համար՝ սկսած 2009 թվականից, ակտիվների շահութաբերության նորմը կսահմանվի ՀՀ էներգետիկայի հանձնաժողովի կողմից՝ ելնելով Հայաստանում ռիսկի նույն մակարդակով գործող արդյունաբերական ընկերությունների շահութաբերության վերլուծությունից:

4. Հանձնաժողովի կողմից բաշխիչ ընկերություններին վաճառվող էլեկտրաէներգիայի սակագների փոփոխության դեպքում համապատասխան փոփոխությունների կենթարկվեն՝

- ♦ 2001-2003 թվականների ընթացքում՝ միայն սպառողներին էլեկտրաէներգիայի վաճառքի մանրածախ սակագները, համաձայն օրենքի այդ ժամանակահատվածում ապահովելով անփոփոխ սակագնային մարժա.

- ♦ 2004 թվականից սկսած՝ ինչպես սպառողներին էլեկտրաէներգիայի վաճառքի մանրածախ սակագները, այնպես էլ բաշխիչ ընկերությունների սակագնային մարժան այն մասով, որը վերաբերում է տեխնիկական անխուսափելի կորուստների արժեքին:

Էլեկտրաէներգիայի մեծածախ շուկայում՝ ազատ գնագոյացման պայմաններում, բաշխիչ ընկերությունների կողմից գնված էլեկտրաէներգիայի միջին կշռությային սակագնի փոփոխությունը հաշվի կառնվի սակագնային մարժայում և մանրածախ վաճառքի սակագնում պահանջվող աճի կամ նվազման 50,0%-ի չափով:

5. 2001-2003թթ. օրենքով սահմանված անփոփոխ սակագնային մարժայի գործողության ժամանակահատվածում իրականացված ներդրումների Քբացառությամբ մաշվածքի պարտադիր վերաներդրման² պահանջվող զուտ շահույթը կհաշվարկվի 16,0% դրույքաչափով և սկսած 2004 թվականից այն կհատուցվի ոչ ուշ, քան երեք տարվա ընթացքում:

6. Յուրաքանչյուր օրացուցային տարում ընկերության ակտիվների իրական շահութաբերության՝ սակագնային մարժայում հաստատված նորմայից շեղվելու դեպքում, եթե այդ շեղման չափը կազմում է, 1,0 տոկոսային կետից ավելի, ապա լրացուցիչ շահույթի (վնասի) 50%-ը հանվում է (գումարվում է) հաջորդ օրացուցային տարվա անհրաժեշտ հասույթից (հասույթին): Շեղման չափը որոշելիս ընթացիկ տարվա շեղումը անտեսվում է:

Ընկերության շահագործման և պահպանման ծախսերի, էլեկտրաէներգիայի կորուստների և անհուսալի դեբիտորական պարտքերի՝ սակագնային մարժայի հաշվարկում նախատեսված չափերին գերազանցելու պատճառով առաջացած շահույթի նվազումը հետագայում փոխհատուցման ենթակա չէ:

7. ԱՄՆ դոլարի փոխարժեքի փոփոխությունները սակագնային մարժայի հաշվարկում հաշվի կառնվեն ոչ շուտ, քան կիսամյակը մեկ անգամ:

8. Սույն սակագնային համաձայնագրի դրույթները որպես լիցենզիայի պայմաններ ամրագրվելու են ՀՀ էներգետիկայի հանձնաժողովի կողմից նոր ընկերությանը տրամադրվող բաշխման գործունեության լիցենզիայում: Լիցենզիայի և սույն Համաձայնագրի պայմանների հնարավոր անհամապատասխանության դեպքում գերակայում են Լիցենզիայի պայմանները:

9. Կողմերը համաձայնվում են, որ գործունեության լիցենզիայի կամ բաժնետոմսերի առուվաճառքի պայմանագրի պայմանները խախտելու դեպքում ՀՀ էներգետիկայի հանձնաժողովը կարող է կիրառել համապատասխան միջոցներ, ընդհուպ մինչև սակագնային մարժայի նվազեցում:

Ի վկայություն վերը շարադրվածի, կողմերի լիազոր ներկայացուցիչները ստորագրեցին սույն սակագնային համաձայնագիրը և փաստեցին, որ նշված դրույթները կգործեն նաև _____ և _____ ընկերությունների միաձուլումից (միացումից) հետո վերակազմակերպվող նոր բաշխող ընկերությանը հանձնաժողովի կողմից գործունեության նոր լիցենզիա տրամադրելու օրվանից, որում կամրագրվեն նաև այլ դրույթներ, ներառյալ՝ սպասարկման որակի ցուցանիշները:

անուն, ազգանուն

պաշտոնը

ստորագրություն
ստորագրություն

անուն, ազգանուն

պաշտոնը

Հաստատված է
ՀՀ էներգետիկայի հանձնաժողովի
2001թ.-----ի N----- որոշմամբ